

Rapport dalla sessiun dil cussegl da vischnaunca dils 10-09-2018

Tractanda 1

Approbaziun dil protocol dalla sessiun dils 18-06-2018

Il protocol dalla sessiun dils 18 da zercladur 2018 vegn approbaus en votaziun unanima cun engraziament.

Tractanda 2

Vendita dalla cumpart casa e clavau digl anteriur consum da Schlans (parcelas 6295 e 6296)

El decuors digl onn 2010 ha l'anteriura vischnaunca da Schlans surpriu il menaschi dalla stizun dil vitg Schlans. L'associaziun da consum purila Schlans ha surdau il medem onn lur cumpart da 38/100 vid la casa e la mesadad dil clavau che s'udeva leutier alla vischnaunca. Il davos digl onn 2016 ei la stizun dil vitg Schlans vegnida serrada. La localitad dalla stizun ei restada vita. Suenter che l'otra mesadad dalla casa ei medemamein daventada vita ha la suprastonza communal decidu ensemen culs possesurs da tala da vender igl entir object. Gia avon che scriver ora igl object ufficialmein ein pliras personas s'interessadas per tal. Suenter contractivas eis ei reussiu d'anflar ina cumpradra. La suprastonza communal ha schau preparar in sboz dil contract entras il cudisch funsil e propona al cussegl da vischnaunca la vendita dallas cumparts en possess dalla vischnaunca per in prezi da frs. 112'000.-.

Cun 13 : 0 vuschs autorisescha il cussegl da vischnaunca la suprastonza communal d'exequir la vendita dalla cumpart casa sin parcella 6295 sco era dalla mesadad dil clavau sin parcella 6296 a Schlans per in prezi total da frs. 112'000.-.

Tractanda 3

Informaziun davart la lavina dall'Alp da Schlans

Il selvicultur da revier Mattias Cadruvi informescha il cussegl da vischnaunca davart ils donns dalla lavina dils 22 da schaner 2018 e davart ils cuosts che seresultan ord tala. La lavina dall'Alp da Schlans ha destruiu respectivamein donnegiau 25ha uaul, 40ha pastiras d'alp, 500m dalla via d'Alp ed 1km dallas sendas da viagiar. Ils baghetgs dalla Alp-Sut ein vegni destrui totalmein e la tegia dall'Alp da Schlans ha giu in donn vid igl esch. Il cantun e l'assicuranza d'edifecis Grischuna separticipeschan vid ils cuosts totals da frs. 323'000.- che la lavina ha caschunau. Per la vischnaunca da Trun seresultan cuosts restonts ell'altezia da frs. 93'500.-.

Tractanda 4

Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Beat Pfister

L'actuara
Sandra Gautschi